

KERATAN AKHBAR

JUDUL : Utusan Malaysia

TARIKH : Rabu, 12 Ogos 2015

M/S : 22



ASYRAF WAJDI DUSUKI (tengah) melakukan gimik pelancaran buku *Garis Panduan Perpustakaan Masjid* sambil diperhatikan **Othman Mustapha (dua dari kanan)**, **Nafisah Ahmad (kiri)**, **Mirza Muhammad Taiyab (dua dari kiri)** dan **Syaikh Ismail Muhammad** sempena *Persidangan Perpustakaan Masjid Peringkat Kebangsaan 2015 di Kuala Lumpur, semalam*.

Tambah bahan bacaan digital di masjid

KUALA LUMPUR 11 Ogos - Umat Islam perlu menjadikan masjid sebagai pusat kecemerlangan ilmu dengan meningkatkan bahan ilmiah berbentuk digital seiring dengan perkembangan teknologi dalam usaha meluaskan pengetahuan umat Islam di negara ini.

Sehubungan dengan itu, segala kemudahan termasuk internet perlu dipertingkatkan sebagai salah satu platform kepada golongan muda untuk menjadikan perpustakaan di masjid sebagai pusat rujukan di samping kewujudan institusi-institusi pengajian tinggi.

Timbalan Menteri di Jabatan Perdana Menteri, Datuk Dr. Asyraf Wajdi Dusuki berkata, usaha tersebut merupakan satu inovasi dalam mengembalikan fungsi masjid dengan lebih menyeluruh.

"Buku atau majalah yang dibuat secara elektronik memudahkan

pengguna mencari maklumat yang dikehendaki. Ia juga dapat disebarkan secara mudah kepada masyarakat umum dan tidak hanya terhad kepada jemaah masjid semata-mata.

"Selain itu, masjid dapat dijadikan tempat tumpuan golongan muda untuk mendapatkan pandangan serta menyelesaikan masalah," katanya dalam sidang akhbar majlis Persidangan Perpustakaan Masjid Peringkat Kebangsaan 2015, di sini hari ini.

Persidangan yang diadakan selama dua hari bermula hari ini menghimpunkan tokoh agama dari beberapa agensi untuk membincangkan dan berkongsi pandangan bagi meningkatkan hala tuju perpustakaan masjid di Malaysia.

Yang turut hadir Ketua Pengarah Jabatan Kemajuan Islam Malaysia (Jakim), Datuk Othman Mustapha; Ketua Pengarah

Perpustakaan Negara Malaysia, Nafisah Ahmad; Ketua Pengarah Tourism Malaysia, Datuk Mirza Muhammad Taiyab dan Imam Besar Masjid Negara, Tan Sri Datuk Syaikh Ismail Muhammad.

Sementara itu, Asyraf Wajdi berkata, umat Islam diseru supaya mengikut prinsip berlandaskan Islam dalam menerima segala maklumat bagi mengelakkan sebarang unsur fitnah yang kini mudah tersebar dengan peningkatan teknologi.

Menurut beliau, masyarakat perlu mendapatkan segala pengesahan dan menyelidik maklumat yang diperolehi terutama menerusi beberapa aplikasi moden.

"Kita perlu bersangka baik apabila menerima apa-apa maklumat sebelum membuat kesimpulan dan buat tindakan kerana kita tidak pasti maklumat tersebut benar atau tidak," katanya.